

EDITORIAL

Gyera nga disimpormasyon sang US para itulod ang Pilipinas sa gyera

Tuman ka athag nga ang imperyalismong US ang indi abyan sang pumulu-yong Pilipino. Ini ang wala duda nga ginpamatud-an sang pagtaya sang militar sang US sa mga Pilipino sa nabuyagyag nga sikreto nga kampanyang disimpormasyon sini sadtong panahon sang pandemyang Covid-19. Madulom nga tuyo sadto sang US nga hilo-an ang pinsar sang mga Pilipino sang sayop nga impormasyon kaangot sa bakuna nga Sinovac halin sa China, pagwaon nga indi ini luwas ukon epektibo, para paburan ang mga bakuna nga himo sa US pareho sang Pfizer kag Moderna. Ang amo nga pagpalapta sang US sang disimpormasyon ang lubha nga nagbutang sa peligro sa pampubliko nga ikaayong-lawas sa Pilipinas, kag ginapatihan nga nangin rason sa hinay nga palakat sadto sang pagpabakuna sa pungsod.


Ang nasambit nga kampanya nga disimpormasyon ang ginpangunahan kag ginpondohan sang Pentagon ukon Department of Defense sang US. Nagsugod ini sa idalom sang anay gubyerno nga Trump, kag nagpadayon tubtob sa una nga bulan sang subong nga gubyernong Biden. Dako nga pondo ang ginbubo sang US para sa pagbutang sang mga suldado kag iban pa nga tinawo para magtuga kag magpadalagan sang ginatos ka mga peke nga *account* sa *social media* para impluwensyahan ang mga Pilipino sa islogan nga "China ang virus".

Ang kampanya nga disimpormasyon nga ini ang ginlunsar sang militar sang US sandig sa linya sang "aktibo nga kombat" nga amo ang doktrina nga ginapaluntad subong sang US sa kompetisyon kag pakiglalisay sa mga imperyalista nga karibal sini nga China kag Russia. Ginagamit sang US ang mga pwersa militar sini sa "aktibo nga kombat" bisan pa wala sang nagakahitabo nga direkta nga armadong kinagamo. Ginahimo ini kadungan ang mga tikang nga pagpang-ipit sa eko-

nomya (pareho sang sangsyon ukon pagpang-ipit sa pagpamuhunan kag baligyaanay), pati na ang aktibo nga paggamit sang pwersa militar agud kontrahon ang nagalapad nga kusog kag impluwensya sang mga karibal sini.

Ang ini nga kampanyang disimpormasyon ukon gyera sa impormasyon ang padayon nga ginalunsar subong sang imperyalismong US sa Pilipinas. Target sini ang pinsar sang mga Pilipino agud pagwaon nga "abyan, katimbang kag kadampig" nila ang US, kag "kontra" ang China. Kasabwat ang mga tuta sini sa gubyernong Marcos, pati na pila ka senador kag kongresista, kag mga bayaran ukon nagaka-impluwensyahan nga

institusyon kag tinawo sa burges nga masmidya, ginahurma ang pinsar sang mga



Pilipino agud madawat nila ang presensya kag pagluntad sang mga suldadong Amerikano sa sulod kag palibot sang pungsod.

Liwat nga ginasuportahan ang ti-ko nga pagpati nga "big brother" ukon "magulang" ang US nga "maga-pangapin" sa "makaluluoy" nga Pilipino, kabaliskaran sa kamatuoran nga duha ka beses na nga gingyera sang imperyalismong US ang Pilipinas para agawon ang kahilwayan nga naangkon sa rebolusyonaryo nga pagbato sang mga Pilipino, una batuk sa kolonyalismong Espanya, kag ika-duha, batuk sa pagpanakop sang Japan. Ginapagwa subong nga sa idalom sang Mutual Defense Treaty, "buligan" sang US ang Pilipinas batuk sa China, bisan nga ang kamatuoran, indi magahulag ang US nga wala gina-una ang kaugalingon sini nga inter-teres. Ginagamit sang US ang mga kasugtanan militar sini sa Pilipinas para magamit ang pungsod nga dako sini nga base militar agud ilunsar ang pagpanghangkat sini sang gyera batuk sa China.

Ginagatungan subong sang US kag rehimen Marcos ang Sinophobia ukon ang isterya, duda, kahadlok ukon kaakig sa China kag tanan nga Chinese sa Pilipinas. Wala man sang kongkreto nga ebidensya, ginapalap-

ta ang mga hugon-hugon bahin sa mga espiha nga Chinese, impiltrasyon kag mga sikreto nga grupo sang mga suldado nga Chinese sa Pilipinas. Mismo nga si Marcos ang numero uno nga promotor sini sa pila ka sulit na niya nga pagpahayag nga isa ka dako nga "pang-gwa nga pamahog" ang China sa Pilipinas, tungod kuno sa mga banggianay pangdagat. Samtang ginatahi ang estorya sang "plano nga paglusob sang China," nagahari-harian ang mga pwersa militar sang US kag bug-os kahilwayan nga ginagamit ang duta, kahawaan kag kadagatan sang Pilipinas sa paghanas kag pagpangandam sa gyera.



Kasabwat ang US, pasulit-sulit ang AFP kag Philippine Coast Guard sa paghana nga magdala sang mga kagamitan pangkonstruksyon sa mga "supply mission" sini sa Ayungin Shoal, nga nahibal-an nila nga magapa-ibwal sa China tungod lapas ini sa daan nga dayalogo ukon negosasyon nga amo ang dapat nga banas para malinong nga solbaron ang kinagamo sa kadagatan. Sa wala untat nga panggarit-garit sang rehimen US-Marcos, ang China ang nangin agre-sibo kag wala kaluoy sa pagkabig sini sa Pilipinas kag sa indi sini pagkilala sa mga kinamatarung sang Pilipinas

nga ginkilala sang pangkalibutanon nga hukom sadtong 2016.

Wala untat, wala kataka kag wala pagkaubos ang pondo nga ginabubo sang imperyalismong US sa tanan nga larangan sang gyera nga impormasyon, para itanom ang gawi-ulipon kag gawi-traydor sa paminsaron sang mga Pilipino. Adlaw-adlaw nga mabatian ang tingog sang imperyalismong US nga nagatuad sang nagkalain-lain nga porma kag pagkatawo sa *social media*, sa mga balita, sa mismo nga bibig ni Marcos kag mga upisyal sang iya nga gubyrno.

Dumot nga katuyuan sang imperyalismong US nga dulaon ang tanan nga dilaab sang pagpalangga sa pungsod sa dughan sang mga Pilipino, kag ipadawat sa pumuluyo nga sila ang malipayon nga mga bilanggo sa idalom sang malakolonyal nga paghari sini sa Pilipinas. Gusto nga ipadawat sa pumuluyo ang ginahimo nga pagtapak sa kahilwayan sang Pilipinas kag paggamit sa pungsod isip instrumento sa pagpanghagyat sang US sang armado nga kinagamo sa China. Gusto nila nga ipiyong sang mga Pilipino ang ila mga mata sa masanag nga kamatuoran nga ang pungsod subong ang instrumento sa estratehiya nga heyopulitikal sang US, nga may katuyuan nga ipatuman ang hegemonya sa nagkalain-lain nga bahin sang kalibutan kag bunguan ang sin-o man nga pungsod ukon pwersa nga magapamatok.

Dapat husto nga magbantay, ibuyagyag kag isikway sang pumuluyong Pilipino ang gyera nga disimpormasyon sang imperyalismong US kag tuta nga rehimen Marcos para kontrolon ukon impluwensyahan ang ila paminsaron, sikolohiya kag emosyon. Wala sang iban nga mas epektibo nga pamaagi kundi nga ilunsar ang kahublagan pagtuon para balik-an ang kasaysayan, indi sa punto de bista nga burges kag maka-US, kundi sa panan-awan sang masa nga nagahimakas, agud pukawon kag padilaa-bon ang diwa nga makipungsod sang pumuluyo, sa ila pag-usoy sa banas sang paghimakas para sa matuod nga kahilwayan sang pungsod. **AB**

 <p>Tuig LV No. 12 Hunyo 21, 2024</p> <hr/> <p>Ang Ang Bayan ginabantala sa lenggwahe nga Pilipino, Bisaya, Iloco, Hiligaynon, Waray, Ingles kag Espanyol. Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikawag sang aton pahayagan.</p>	<h2 style="text-decoration: underline;">Kaundan</h2> <p>Editorial: Gyera nga disimpormasyon sang US para itulod ang Pilipinas sa gyera 1 Mga suldado, gin-isnaysang BHB 3 Paglupok sang Bulkan Kanlaon 3 Adlaw sang peke nga kahilwayan, gindumdom 3 Pamahog sa kahilwayan sang Pilipinas ang US 3 Indi mahabas ang suporta sang masa 4 Kahublagan panadlong sa Negros 5 Hamulag, apang kaupod sa gihapon 6 Sa malip-ot nga pulong 7 Pas-an ang kalbaryo nga tuga sang El Niño 8 Hacienda Roxas: Kagarukan sang CARP 9 Protesta sa ika-36 sang CARP 9 16-anyos nga estudyante, ginpatay 10 Mga protesta 10</p>
<p>Ang Ang Bayan ginabantala duha ka beses kada bulan sang Komite Sentral sang Partido Komunista ng Pilipinas</p>	
<p style="text-align: center;"> ang.bayan@cpp.ph</p>	

Mga suldado, gin-isnaysang BHB-Western Samar

GIN-ISNAYP SANG BAGONG Hukbong Bayan (BHB)-Western Samar (Arnulfo Ortiz Command) ang mga suldado sang 87th IB nga nagakampo sa Sityo San Pedro, Barangay Poblacion 3, San Jose de Buan, Samar sadtong Hunyo 9. Nagatukod sang kudal sa sulod sang sityo ang mga suldado para sa plano nila nga tukoron nga detatsment diri.

Napatay sa isnayp ang suldado nga si Corporal Marvin Calvintos sang 87th IB. Ginpaulanan sang mga Pulang hangaway sang bala ang mga suldado nga nagresulta sa pagkapilas sang madamo sa ila.

Isip balos, ginpa-ukpan sang mga suldado ang mga sibilyan nga komunidad. Ginkanyon nila ang mga bukid kag ulumhan malapit sa sityo nga nagtuga sang kulba sa mga mangunguma. Kalabanan sa mga mangunguma ang wala na nakapanguma sa ila kaingin. Ang iban ang natulod nga magbakwit sa kahadlok nga maigo sang mga bomba.

Ang San Pedro ang militarizado na pagsugod sang tuig 2024. Nalista diri ang nagasinampaw nga mga paglapas sa tawhanon nga kinamatarung.

Paglupek sang Bulkan Kanlaon, ginrespondehan sang BHB-Negros

NAGAHULAG SUBONG ANG mga yunit kag kumand sa idalom sang Bagong Hukbong Bayan (BHB)-Negros Island (Apolinario Gatmaitan Command) para respondehan kag magbulig sa masang Negrosanon nga apektado sang paglupek sang Bulkan Kanlaon. Naglupek ang bulkan sadtong Hunyo 3 kag nakaa-gum sang pagdaganas sang lahar halin sa bulkan ang mga komunidad sa Central Negros sadtong Hunyo 6 tuga sang mabaskog nga pagbubo sang ulan nga nagsamo sa abo nga ginbuga sang bulkan.

Doble nga pasakit sa masang Negrosanon ang paglupek sang Bulkan Kanlaon tungod wala pa sila nakabangon halin sa delubyo sang tig-ilinit sadtong panahon sang El Niño.

Sa mga balita, naglab-ot na sa 15,511 pamilya (halos 50,000 katawo) sa 23 ka barangay ang apektado sang paglupek sang bulkan sadtong Hunyo 18. Ginabulubanta nga naglab-ot sa ₱10 milyon na ang kahalitan nga gintuga sini sa agrikultura.

Sa baylo nga kongkreto kag lehitimo nga bulig, nagpakitang-gilas lang ang rehimen Marcos Jr sa paghatag sini sang indi sustainable nga ayuda para sa pamulitika sini kag propaganda militar. Sa tunga sang katalagman, gindeklarar pa sang 303rd IBde nga indi sini pag-untaton ang mga operasyon kombat sa mga apektado nga komunidad. Sa pila ka higayon, gingamit pa sang mga suldado ang pagpangtag sang ayuda para pilit nga "pasungkaon" ang mga sibilyan.

Adlaw sang peke nga kahilwayan, gindumdom sa mga rali

NAGPROTESTA ANG MGA grupo nga pungsodnon-demokratiko sa sulod kag gwa sang pungsod para kundenaron ang nagapadayon nga neokolonyal nga paghari sang imperyalismong US sa pungsod sadtong Hunyo 12, adlaw sang peke nga kahilwayan sang pungsod.

Nagmartsa sila padulong sa embahada sang US sa Roxas Boulevard kag nagpanawagan sa pumuluyong Pilipino nga ibuyagyag kag pamatukan ang imperyalismong US kag ipakigbato ang matuod nga kahilwayan kag demokrasya sa Pilipinas.

Samtang, nagtigayon sang karaban ang mga demokratiko nga organisasyon sang Southern Tagalog sa mga banwa sang Cavite, kabahin sa Kawit kung sa diin gindeklarar ang peke nga kahilwayan sang Pilipinas. Sa Cebu City, naglunsar man sang demonstrasyon sa Colon Street.

Nagkalain-lain nga aktibidad kag hublag naman ang ginlunsar sa San Francisco kag Los Angeles sa California, sa Washington, Chicago kag Oregon sa US.

Samtang, nagpagwa sang pahayag ang mga sanga sang National Democratic Front of the Philippines halin sa nagkalain-lain nga rehiyon kag mga alyado nga organisasyon sini kaangot sang adlaw sang peke nga kahilwayan. Sandig sa ila, ang pag-angkon sang lubos nga kahilwayan sang pungsod Pilipinas ang mahitabo lamang sa pagdaog sang demokratiko nga rebolusyon sang banwa.

Pamahog sa kahilwayan sang Pilipinas ang mga base militar kag war games sang US

SA MGA KOMUNIDAD sa palibot sang mga base militar sang US, ukon gintawag nga "EDCA site" kag mga ginalunsaran sang Balikatan 2024, lapnagon ang kapabayaang, disimpormasyon kag pagpang-ipit sang reaksyunaryong gubyerno kag militar sang US. Ini ang kongklusyon sang isa ka *fact-finding mission* nga gintigayon sang Bayan-USA kag PINAS Peace mission sa Central Luzon, Ilocos Norte kag Marawi City. Ginsapubliko nila sadtong Hunyo 12 ang resulta sang 3-sembana nga imbestigasyon.

Kabahin sa mga natukiban sang delegasyon ang pagtambak sang US sang ginadudahan nga gamit-militar sa gwa sang gintalana nga mga "EDCA site" kag paghimulos sang mga suldadong Amerikano sa mga rekurso sang masang Cagayanon: pakigsabwatan sang mga pribado nga kumpanya kag militar; kawad-on sang pagpahibalo sa mga komunidad sa Ilocos kag Cagayan kung sa diin ginlunsar ang Balikatan nga nagresulta sa troma kag kahadlok sa sibilyan nga populasyon; kag militarisasyon, pagpang-ipit kag *Red-tagging* sa mga komunidad nga nagapangapin lang sang ila nga palangabuhian. Sa Marawi City, napaambit sang mga lokal nga upisyal ang disimpormasyon kaangot sa ginatukod nga base militar kag "economic zone" katambi sini sa "ground zero" gamit ang pondo sang EDCA.

Sandig sa delegasyon, pamahog sa kahilwayan sang mga Pilipino ang tanan nga ini, kag dapat pasabton ang rehimen Marcos, amo man ang gubyerno sang US sa idalom ni Joseph Biden sa kahalitan nga dala sini nga militarismo sa pinakaimol nga sektor.

Indi kasan-o man mahubas ang suporta sa rebolusyon sang masa sa Samar

Nagbulos-bulos man sang henerasyon sang masang mangunguma sa Samar, indi mahubas ang ila suporta sa Bagong Hukbong Bayan (BHB). Ini ang mensahe sang rebolusyonaryong masa sa prubinsya sang may yara sang higayon nga liwat makigsalamuha ang BHB matapos ang pila ka panahon nga pagka-utod sang angot.

"Ginpadako kami nga mag-ulutod sang amon mga ginikanan nga may mataas nga pagrespeto sa mga kaupod," pahayag ni Ka Amboy sa isa ka simple pero mahinungdanon nga kahiwatan sa ika-55 nga anibersaryo sang BHB sadtong Marso 29. Bisan indi siya pamilyar sa kalabanan sa bag-o nga mga hangaway nga nag-abot sa ila, wala siya namag-uhan kag gilayon niya nga nahamut-an ang mga kaupod. "Nadumduman ko ang ginhambal sang akon nga amay, nga bisan diin kami makalab-ot kag makakita kami sang NPA, aton ina, tungod ang ila ginapakigbato ang para sa pareho naton nga mga imol."

Masami nga ginapahanumduman ni Ka Amboy ang ila mga kabaryo nga naangkon nila ang mga kadalag-an sa palangabuhian kag ginagmay nga nga bugay halin sa gubyerno tungod sa rebolusyonaryong kahublagan. Lubos pagsalig nila nga madamo pa sa giha-pon ang nagakilala, nagapalangga kag nagadampig sa BHB sa ila nga baryo tungod diri.

Nagapasalamat man ang isa ka mangunguma sa mga hangaway, nga kalabanan mga pamatan-on. "Ginapadayon ninyo ang paghimakas nga ginpanghimatyan sang akon utod," pahayag ni Ka Ambon. Namartir sa isa ka inaway ang ila nga utod sadtong 1987. Gusto man kuntani niya nga magpultaym apang madamo siya sang gagmay nga mga kabataan sadto. "Subong, indi na ako makasarang tungod tigulang na ako kag may rayuma na," saysay niya. "Nagapasalamat ako sa inyo tungod nagapadayon kamo. Indi man ko maka-upod sa inyo, bisan ano nga oras nga kinahanglan niyo ko, magabulig ako kag ang akon

nga pamilya." Bukas man siya nga suporta-han kung mahitabo nga magpatapo sa hukbo sang banwa ang sinoman sa iya mga apo.

Ginpalab-ot sang tagabaryo ang ila nga pagpasalamat sa pagbulig sang BHB sa ila mga ulumhan. "Bisan wala kami didto, bisan wala kami nakahibalo, padayon kamo nga nagabulig sa amon sa uma," base naman kay Ka Huling. "Salamat gid nga madamo sa inyo. Sa matuod lang, diri ko sa inyo nabatyagan ang matuod nga kalipay sang pag-alagad. Amo nga matuod nga malipayon ako kung upod ko kamo. Palangga gid namon kamo."

Pagbahin sang masa, dyutay lang sila napapati sang militar nga wala na sang hukbo sang banwa sa ila nga lugar tungod nga madugay-dugay na nga panahon nga wala sila nakadtuan sang yunit sang BHB. "Amo nga sang nakabalita kami nga may mga kaupod, nabuhian kami sang buot," sandig kay Ka Bining, isa sa mga nagtambong sa pagtililipon. Apang panaysayon niya, naghalong man sila kag basi mga nagapakuno-kuno lang nga mga bag-uhan nga Pulang hangaway. Nahim-us man ang iya buot sang nakasalamuha niya ang mga hangaway.

"Husto ako nga indi kasan-o man pwede nga madula ang NPA basta wala pa kita nagdaog," tuad niya.

Ginsaysay niya nga indi niya kasan-o man luiban ang mga kaupod. "Wala ako nagbag-o, bisan nagdugay diri ang kaaway, wala ako nagsungka," hambal niya. "Ang nahibal-an ko, sa akon lang, tubtob subong napabilin ko ang mga sikreto."



Magluwas sa maundanon nga mga tinaga, naghalad sang kanta kag iban nga pangkultura nga pasundayag ang masa, nga lubos nga ginkalingawan kag nakapagpataas sang moral sa mga kaupod. Nagpasalamat man ang mga kaupod sa maisog kag mainit nga pagdawat sa ila sang mga residente kag ang pagsikreto sa ila presensya kag hulag sa mata sang militar. Samtang nag-ululupod ang masa kag hukbo sa amo nga lugar, indi magnubo sa 40 ka kolum ang naga-operasyon nga militar sa mga barangay nga sakop sang mga banwa sang San Jose de Buan, Gandara, San Jorge, Catbalogan, Motiong, Jiabong kag Paranas sa Samar kag sa mga baryo sang Can-avid kag Dolores sa Eastern Samar. Yara sa 80 ka baryo ang napaidalom sa mga operasyon nga RCSP.

Sa amo nga pagtililipon, kolektibo nga ginpabakod sang mga Pulang kumander, hangaway kag rebolusyonaryong masa ang ila nga dedikasyon kag kabubut-on nga isulong ang rebolusyonaryo nga paghimakas. Armado sang mga leksyon sa nagliligad, determinado sila nga panginbabawan ang natumod nga mga kahuyangan kag himuon ang tanan nga pagtinguha para magsabat sa panawagan nga pakalayuhon ang armado nga paghimakas kag magsulong nga may tumangman nga kusog. AB

Kahublagan panadlong sa Negros sa tunga sang grabe nga operasyon militar

Sa tunga sang padayon nga terorismo kag pasista nga pagpanumpo sa Negros, pursigido nga ginpatuman sang mga kadre kag katapo sang Partido sa isla ang panawagan sang Komite Sentral sadtong Disyembre 2023 nga isulong ang kahublagan panadlong.

Gingamit sini nga praktikal nga sulundan ang Rebolusyon, pamantalaan nga teoritikal sang Partido Komunista ng Pilipinas, kag ang mga sinulat ni Jose Maria Sison sang pagtililipon, sinapol, pagtasa, pagtuki kag pagsumada sang mga kaangot nga rebolusyonaryong hilikuton sa tanan nga mga larangan gerilya sa isla. Nanging positibo ang resulta sini sa bugos nga rebolusyonaryong kahublagan sa Negros. Napadasig ang paghiliusa sa pagtumod sa mga kahuyangan halin sa kolektibo nga pagtuki sa praktikal nga mga hambalanon kag rebolusyonaryong hilikuton, ilabi na sa mga kahuyangan sa armado nga paghimakas nga nagtuga sang negatibo nga epekto sa pangkabilogan nga pagsulong.

Sa una nga kwarto sang 2024, ginreposito sang Partido sa Negros ang 22 ka tuig nga komprehensibo nga pagsumada sang rebolusyonaryong inaghan sa rehiyon halin sang Ikaduhang Dunganon nga Kahublagan Panadlong tubtob tuig 2016. Nanging basehan ini para sa komprehensibo nga pagsumada sang Partido sa isla sa hilikuton ideolohiya, pulitika kag organisasyon sa tuig 2017-2022, kag para tumuron kag tadlungon ang nagkalain-lain nga porma sang sayop kag kahuyangan.

Sa pagpatuman sang kahublagan panadlong, nagtalanang mga responsable nga kadre sang Partido agud ibuylo ang kahublagan pagtuon. Bisan sa atubang sang grabe nga atake sang kaaway sa mga baseng gerilya, padayon ang paglunsar sang kolektibo nga pagtuon sang mga dokumento sang Partido sa una kag ikaduha nga kahublagan panadlong. Ilabi nga nanging pagsik ang mga pagtuon sa

sulod sang mga yunit sang Bagong Hukbong Bayan tubtob sa lokal nga mga yunit sang Partido tungod sa aktibo nga partisipasyon sang mga tumuluon halin sa lamharon kag mas magulang nga kadre kag katapuan. Kolektibo nila nga gintun-an ang pahayag sang Komite Sentral kag Komiteng Panrehiyon sang Partido sa Isla sang Negros sa ika-55 ka tuig nga anibersaryo sang Partido.

Ginlunsar man ang konsentrado nga pagtuon sang mga aktibista kag bag-ong rekrut sa BHB sa Batayang Kurso ng Partido. Pagtuon sang Imperyalismo, ginhatagan tum-ok ang nagaluntad subong nga krisis nga nagbunga sa lapnagon nga gyera halin sa pagpanulsol sang imperyalistang US sa mga kaalyado sini nga pungsod ilabi na sa grabe nga bangigay sang US-China kag ang kongkreto nga epekto sini sa pumuluyong Pilipino. Magluwas diri, ginlunsar ang pagtasa sa isa ka tuig nga programa sang Partido sa tagsa ka larangan gerilya kag mga pagsaway kag pagsaway sa kaugalingon, samtang ginalunsar ang indibidwal nga pagtasa sa sulod sang BHB.

Base kay Ka Marga, "Sa pagrebolusyon, kinahanglan ang wala pagpang-alang-alang sa pagtuon sang mga sandigan nga prinsipyo


kag wala kakapoy nga pagtuki sa obhetibo nga kahimtangan kag labaw sa tanan ang pagbrektru sa pagpabas-kog sang taktikal nga opensiba para kuhaon ang mga armas halin sa kaaway."

Base kay Ka Dayan, isa sa mga instruktur sa pagtuon, napasang pa ang kinaalam niya sa mga sandigan nga prinsipyo sang Partido samtang nagahatag sang pagtuon. Samtang wala ginlauman ni Ka Victor, isa sa mga magulang nga kadre sang Partido halin sa IDKP, nga daw nagbalik tan-aw siya sa mga panghitabo sa kasaysayan sang Partido kag rebolusyon.

"Ginahangkat kita sang tuman kabaskog nga panahon kag kontradiksiyon. Indi mahadlok. Ang matuod nga kahilwayan ang indi imahinasyon lang kundi maangkon ini sa pagpu-kaw, pag-organisa kag pagpahulag sa masa agud maghimakas!" tuad ni Ka Yan, isa sa lamharon nga kadre nga tumuluon.

Gintahasan sang Partido sa isla ang tanan nga yunit sang BHB nga magpursige sa hilikuton rekoberi, konsolidasyon kag pagpalapad. Kinahanglan lab-uton ang mga lugar nga madugay na nga wala nabalikan, ilabi na ang mga lugar nga wala pa nalabot. Gintahasan man ang mga komite sang Partido nga giyahan ang maukod nga pagsulong sang masa sa mga kontra-pyudal kag kontra-pasista nga kampanya sa kabukiran kag isugpon kag alsa-hon ini sa lebel sang kontra-imperyalista kag kontra-pasista nga kampanya sa kasyudaran agud lab-uton ang ila mga demokratiko nga interes.

Labaw sa tanan, dapat maglunsar sang madinalag-on nga taktikal nga opensiba kag makakuha sang mga armas sang pasista nga kaaway gamit ang husto nga taktika, teknika kag pamaagi sang inaway gerilya. **AB**



Hamulag, apang kaupod sa gihapon

Liwat nga nagtuhaw kasan-o lang ang hambalanon sang diborsyo sang ginpasa sang manubo nga kapulungan sang Kongreso ang sugyot nga pagpasar sa laye sini sa Pilipinas. Lain kaysa sa *annulment* (pagdula sang dulot) kag ligal nga pagbulagay, ang ligal nga opsyon sang diborsyo kag pagdula sang kasal, pagbalik sa tindog nga "single" sang mag-asawa kag pagpahatnugot sa ila nga magpakasal sa iban.

Yara sa laye nga sa tanan nga pungsod sa bilog nga kalibutan ang diborsyo, magluwas sa Pilipinas kag Vatican City. Sa kinadak-an, ginakilala ang diborsyo isip kinamatarung sang kababainhan para mag-angkon sang hustisya, ilabi na sa mga kaso sang kapintas sa sulod sang panimalay, kasal sa bata kag pinansyal nga pagpang-ulipon. Ginahatagan sini ang kababainhan sang ligal nga opsyon para maghalin sa mapamigos kag mapangkuga nga mga pag-upod, mag-angkon sang pampinansya nga independensya kag hangkaton ang patriyarkal nga pagkabig kung sa diin ginakabig sila nga ginapanag-iyahan sang ila mga asawa.

Bisan wala napahayag sa laye, ang pagbulagay sa Pilipinas ang isa ka ordinaryo na nga reyalidad ukon obhetibo nga kahimtangan sa kubay sang pumuluyo. Ini tungod nagaluntad ang kagarukan sa katilingban nga nagatuga sang mga kundisyon sang pagbulagay sang mag-asawa.

Huyang, kung indi man kaladlawan, ang mga argumento batuk sa diborsyo. Indi sablag sa madamo nga pungsod ang relihiyon para kilalanon ang kinahanglanon sa pagpasar sa la-

ye diri para giyahan ang mga pagbulagay kag siguraduhon ang mga kinamatarung kag kaayuhan sang tanan nga may salabton.

Sa sulod sang rebolusyonaryong kahublagaan, ginakilala ang diborsyo isip kinamatarung sa idalom sang mga pagsulundan sa kasal. Sakop sang mga pagsulundan nga ini ang mga relasyon nga lalaki kag babaye, kag sa tunga sang mga indibidwal nga may pareho sang kasarian. Naghalin ang pagkilala nga ini sa dialektikal nga materyalistang panan-awan nga nagabag-o ang mga bagay, kabahin ang relasyon sa sulod sang isa ka kasal. Pagkilala man ini sa nagaluntad nga kamatuoran nga may yara sang mapamigos, indi patas kag mapang-abuso nga mga pag-upod, amo man ang posibilidad nga madula ang gugma kag pagsalig sa tunga sang mag-asawa.

Gintukod kag ginapa-uswag sang mga rebolusyonaryo ang relasyon nga magnobyahanay kag mag-asawa sa pundasyon sang *class love* (paghigugma sa kasahi) kag *sex love* (paghigugma sa indibidwal). Bag-o magsulod sa kasal, ginapangayo sa taga ka kaupod nga paminsaran kag seryoso nga pangandaman ang kabuhi mag-asawa

kag rebolusyonaryo nga pagpamilya. Kung magpadulong sa diborsyo, ginahagi ini sa proseso kung sa diin ginahan-ay ang petyon para sa pagdula sang kasal sa mga yunit, kag kolektibo ini nga ginatuki kag ginadesisyonan.

Gina-uyunan ang diborsyo sa mga kaso nga may yara sang pagtraydor ukon pagka bat-ulan nga kontra-rebolusyonaryo sang isa sa mag-asawa; pagluib, bigamiya, ukon pagpanakit ukon paghana sa kabuhi sang asawa; kapaslawan nga ipatuman ang mga katungdanan isip asawa sa sulod sang lima ka tuig tungod sa pagdakop sang kaaway ukon permanente nga kapansanan pisikal (kung mahisugtan sang mag-asawa); kung isa sa mag-asawa ang hilway nga naghalin sa iya salabton sa sulod sang duha ka tuig ukon nadulaan sang angot sang lima ka tuig; kung ang mag-asawa ang may personal nga indi pagsaw-anay nga nagbunga sa pagkaguba sang relasyon, kag ang relasyon nga nangin pabug-at na sa mag-asawa kag sa hilikuton nila sa Partido.

Sa mga kaso sang malala nga paglapas, pareho sang lubos nga pagluib sa asawa, duha ka asawa, kapintas ukon paghana sa kabuhi sang asawa, ginapatuman sang Partido ang may kabug-aton nga silot, kabahin ang pagpahalin sa nakasayop sa organisasyon.

Ginapasiguro sang mga kolektiba sang mag-asawa nga nagdiborsyo nga mahatagan ang ila mga kabataan sang suporta moral, emosyunal, sikolohikal kag pinansyal—sandig sa nagaluntad nga mga patakaran.

Isip mga rebolusyonaryo, ginayatan sang mga mag-asawa nga bulag na ang gugma sa sahi bisan nga nadula na ang gugma sa tunga nila. Nagatindog sila nga mga modelo samtang nagapadayon sa paghulag kag pag-uyat sa ila nga mga katungdanan sa Partido kag rebolusyon. Ang mga nakapaidalom sa aksyon pangdisiplina ang ginagiyahan sang Partido para lubos nga makapanadlong kag magbag-o.



18% ukon 2 ka milyon nga mga batang Pilipino, edad 5-panubo,



ang "lubha nga kulang sa pagkaon" ukon makakaon lang sang duha halin sa walo ka grupo sang pagkaon nga kinahanglanon para magdako sila sang husto.

Dagdag (5)

ang grado sang Pilipinas sa pagtib-ong sang mga kinamatarung sang mamumugon.

Sa ikaduha, nagapabilin ini nga isa sa 10 ka pinakamalala nga lugar para sa mamumugon.

Ginkuhaan: Global Rights Index 2024, International Trade Union Confederation

86%

sang mga Pilipino nga "knowledge worker" (mga mamumugon sa IT, akademya, syentista, inhinyero kag iban pa nga propesyunal) ang nagagamit sang AI (*artificial intelligence*), mas taas kaysa internasyunal nga abereyds nga 75%.

Ginkuhaan: 2024 Work Trend Index

16 ka proyektong pang-enerhiya sa hangin (*wind energy*) ang gin-aprubahan sang lokal nga gubyerno sang Camarines Sur, kabahin ang pagtukod sang **₱163-milyon** nga *offshore* wind farm sa San Miguel Bay nga 100% nga ginapanag-iyahan sang kumpanya nga Danish.

Maapektuhan sang mga proyekto nga ini ang palangabuhian sang linibo ka mangingisda.

₱23 BILYON

kinahanglan para tapuson ang ginapatukod nga bag-o nga bilding sang Senado sa Taguig City. Sobra nga naghobok ang gasto halin sa inisyal nga **₱8.9** kantidad sang proyekto.

134

proyekto sang mapanghalit nga pagmina nga nagasakop sa 59,000 ektarya nga dutang tumandok kag kalasangan ang gin-aprubahan sang rehimen Marcos ukon ginhatagan sang permit nga magpadayon ang operasyon.

16

8,500

rehistrado nga mangingisda kag 2,000 indibidwal ang mawad-an sang palangabuhian sa plano nga pagbutang sang 2,000-ektarya nga solar project sa Laguna Lake.



UJOS 2024

bukas na nga magbaton sang mga kontribusyon nga obra kag hinimo nga sining! Ipadala ang inyo nga mga obra sa **ulos2024@proton.me**.

Pas-an sang anakbalhas ang kalbaryo nga tuga sang El Niño kag pagbag-o sang klima

Natapos na ang El Niño kag nagsulod na ang tig-ululan, pero padayon pa sa gihapon nga ginapas-an sang masang anakbalhas, ilabi na sang mga mangu-nguma kag mangingisda, ang kalbaryo sa pagkawasak sang ila palangabuhian sang tig-ilinit nga ginpabaskog sang pagbag-o sang klima. Tuman ka kulang kag kasubong nga pakita-tawo lang ang nangin sabat sang rehimen Marcos sa halos isa ka tuig nga pagpangdalasa sini.

Sa pinaka-ulih nga konserbatibo nga datos sang Department of Agriculture, indi magnubo sa ₱9.89 bilion ang kabilugan nga kantidad sang kahalitan sa sektor sang agrikultura kung sa diin ₱57.72 milyon ang sa pangisda. Sa kabilugan, naglab-ot sa 1.5 milyon ka pamilya ang naapektuhan sang malaparan nga tig-ilinit nga nangdalasa sa 7,184 ka barangay sa 15 ka rehiyon. Sa kabaskugon sang pag-igo, ginpaidalom sa state of calamity ang 432 ka syudad kag banwa.

Kahalitan sa Ilocos

Halin 2020 nagadako na ang pag-nubo sa ani kag kita sang mga mangu-nguma sa Ilocos tuga sang kakulang sang patubig, padayon nga pagtaas sang gasto sa produksyon, indi haum nga binhi sang humay nga high-yielding variety, mga kalamidad kag peste, kag kawad-on sang subsidyo sang gubyerno. Ginpalala sang tig-ilinit ang mga problema nga ini.

Nagasalig sa ulan ang kalabanan sa mga ulumhan sa rehiyon. Tungod sa tig-ilinit, nahagmak ang ani sang mga mangu-nguma sang 50% tubtob 80%. Malapad nga ulumhan ang wala natamnan sang *second crop* sa humay (ikaduha nga pagtanom sa tuig), kag wala na natamnan sang mga produkto nga pang-tig-ilinit pareho sang sandiya kag bombay.

Nagnubo ang ani sa mais sang tubtob 50% (halin 4-5 tonelada padulong sa 2-3.5 tonelada kada ektarya) tungod sa pagka-arikutoy kag sobra nga pagkalaya sang mga ini. Dako man ang

halit kag pagnubo sa kalidad sang tanom nga tabako. Sa nakuha nga datus sa 49 ka mangu-nguma sang lima ka barangay pa lang nga nagatanom sang humay, naglab-ot sa 12.31 ektarya ukon 67% sang ila nga ulumhan ang naguba kag nawad-an sila sang ₱644,645 nga kita.

Sa mga mangingisda, naglab-ot sa 99% ang ginhagmak sang panguha nga isda sa mga baybay. Halin sa daan nga 500 kilo nga panguha, kung kis-a wala pa lima ka kilo ang ila madala pauli. Tungod diri, madamo sang mangingisda ang panalagsa ukon wala na nagapalawod tungod sa sobra nga pagkalugi. Mala man ang mga suba, sapa kag inektarya nga mga punong sang isda.

Ginlukdo sang mga mangu-nguma ang dugang nga gasto sa krudo, gasolina kag kuryente nga padayon nga nagmahal. Ilabi nga nagbaskog kag nagsagunson ang pagbomba sang tubig gamit ang krudo kag kuryente, halin isa ka beses padulong tatlo kada semana. Mas madamo man gasolina ang gingamit sang mga mangingisda

tungod kinahanglan nila nga magpalayo para makapangisda.

Uhaw ang nadangatan sang kadam-an sang masang Ilokano tungod sa pagkahubas sang mga bubon. Kalabanan nga komunidad ang wala sang maayo kag libre nga serbisyo sa limpyo nga tubig nga ilimnon. Nagantus sila sa pagsag-ob sa layo, kung indi man higko nga mga bubon, tungod sa pagkahubas sang tubig. Ang iban nagabakal lang sang mahal nga ₱60/drum-₱80/drum sang tubig.

Korapsyon kag pasismo sa Cagayan

Gamay na gani, wala pa nakaluwawas halin sa pagpangurakot ang pondo nga gintigana sang estado para makabulig sa kahalitan sang El Niño. Sa Cagayan Valley, ang gintalana nga pondo para sa bagyong Egay sadtong 2023 ang kalabanan nga ginpanagtag sa mga mangu-nguma kag mangingisda.

Palpak man ang mga ginpanagtag nga binhi tungod wala ini nagtubo sa bagtik nga duta. Nangin problemado pa ang ginpadayaw nga mga cash-for-work program sang gubyerno. Magluwas sa tuman ka kulang kag pipila lang ang "benepisyaryo," tuman ka ulih ang pagpanghatag sang kumpensasyon sa mga nakakuha sini. Talalupangdon man ang indi pag-apruba sang Philippine Crop Insurance Corporation sa aplikasyon sang 9,000 ka mangu-nguma para sa kasigurohan sang ila nga pananom.

Mas nagtigana pa sang pondo kag panahon ang rehimen Marcos sa pagpabaskog sang gyera kontra-insurhensya kag kampanya nga pagpanumpo sa rehiyon. Gingamit pa sini kag sang militar ang pagpanagtag sang ayuda para maglapta sang kabutigan kag *psywar* sa pumuluho. **AB**



Hacienda Roxas: Pamatuod sang kagarukan sang CARP

Pilit nga ginapakita ni Ferdinand Marcos Jr nga nakapullos ang mga mangunguma sa bogus nga Comprehensive Agrarian Reform Program (CARP) sa idal lom sang iya nga rehimen. Sa nagligad nga mga binulan, wala-tuo ang paglibot sa pungsod para sa



palagwaon nga seremonya sang pagpanagtag sang mga Certificates of Land Ownership Awards (CLOA). Ang matuod, peke ang mga palagwaon nga ini tungod nagapabilin nga kontrolado sang pipila ka agalon mayduta ang mga duta nga ulumhan sa pungsod.

Pamatuod diri ang kaso sang 7,000 ektarya nga Hacienda Roxas sa Nasugbu, Batangas. Nabahin ini sa tatlo ka parsela: ang Hacienda Palico, Hacienda Banilad, kag Hacienda Kaylaway nga nagasakop sa nagkalainlain nga mga baryo.

Sadtong dekada 1980, nagtubo ang paghimakas masa sa Hacienda Roxas nga ginpangunahan sang mga mamumugon sang Central Azucarera de Don Pedro, mga mamumugon sa uma, kag mga tenante sang duta sa sulod sang asyenda. Ginbug-os nila ang Damayan ng mga Manggagawang Bukid sa Asyenda Roxas-National Federation of Sugar Workers (DAMBA-NFSW) kag Katipunan ng mga Magbubukid sa Hacienda Roxas Inc. (KA-

MAHARI) para pamunuan ang awayan para sa makatarunganon nga sweldo, makitawhanon nga kondisyon sa pamugon kag iban pa nga kinamatarung.

Pagkatapos mahagmak ang dik-tadura nga Marcos Sr kag ginbuslan ini sang rehimen Aquino I, ginpaidal lom sa CARP ang 2,941 ektarya sang asyenda. Sang mahatagan sang CLOA ang mga mangunguma sadtong 1988, ginpanginpuslan sang sabwatan sang Department of Agrarian Reform (DAR), Roxas and Company Inc (RCI), kag oportunistang anay lider sang DAMBA-NFSW nga si Roy Mahinay kag iya asawa nga si Atty. Nenita Mahinay, nga sadto nagatiglawas sa mga mangunguma, ang tuman kada-

mo nga buslot sang CARP agud pungan ang paganagtag sang duta.

Likom nga ginbaligya sang magasawa nga Mahinay ang awayan sang mga mangunguma kag nagdampig sa agalon mayduta nga RCI. Pagkatapos sang pila ka dekada nga mga pasalig, nagpagwa sang Consolidated Order ang DAR sadtong Disyembre 2023 kung sa diin naga-unod sang kuno pag-atras sang RCI kag mga mangunguma sa tanan nga mga nauna nga petisyon. Sandig diri, gintugyan ang hambalanon sang pagpanag-ya sang duta sa korte. Ang matuod, wala nag-uyon diri ang mga mangunguma kag ang bugtong nga nagpadihot diri amo si Atty. Mahinay, base sa dikta sang agalon mayduta nga RCI.

Sa mando sang DAR, pagasundon ang peke nga "50-50 win-win solution" nga ginrekomendar sang Korte Suprema base sa hangyo sang RCI. Pagakanselahon ang nauna nga mga "mother CLOA" kag ginmandonan ang linibo nga mangunguma nga liwat magpasa sang mga papeles para mahatagan sila sang indibidwal nga mga CLOA.

Sa isa ka kumpas lang sang mga agalon mayduta gilayon nga napawala-dulot ang mga CLOA kag hinanali nga maagaw ang duta sa mga mangunguma. Sa aktwal, wala sang nahitabo nga pagpanagtag sang duta sa sulod sang 36 ka tuig nga pagluntad sang CARP sa asyenda. Wala sang iban kundi panid sang papel ang ila nauyatan kag indi ang lubos nga pagpanag-ya sang duta nga ila ginatikad. AB

Protesta sang mangunguma sa ika-36 nga tuig sang CARP

SADTONG HUNYO 10, nagpiket-protesta ang mga progresibo nga organisasyon sang mga mangunguma, mangingisda kag tigtib-ong sang kinamatarung sa duta sa pagpanguna sang Kilusang Magbubukid ng Pilipinas sa atubang sang DAR sa Quezon City kadungan sa ika-36 nga tuig sang CARP. Ginkundenar nila ang kagarukan sang pinakamadugay, pinakamagasto, kag pinakamapamigos nga "reporma sa duta."

Nakigbahin sa protesta ang mga mangunguma halin sa Bulacan nga biktima sang bogus nga CARP. Pila sa ila ang halin sa mga banwa sang San Mateo kag Norzagaray nga ginpalayas sa ila dutang ulumhan sadtong 2018. Nagkig-ugyon man ang mga mangunguma halin sa San Jose del Monte City nga ginaagawan sang duta sang mga agalon mayduta kag dalagko nga *developer* nga ginalain ang gamit sang dutang ulumhan.

16-anyos nga estudyante, ginpatay sang militar sa Sultan Kudarat

Gintiro kag ginpatay sang 7th IB sadtong Hunyo 9 sa Sityo Kiluding, Barangay Kiadsam, Sen. Ninoy Aquino, Sultan Kudarat ang 16-anyos nga estudyante nga si Eusibio Cranzo, nga kilala man nga Kuni Cuba. Papuli siya upod ang iya utod kag duha ka abyan sang nahitabo ang pagpamatay.

Base sa mga report, nasugata nila Cranzo ang naga-operasyon nga yunit sang 7th IB sang palukpan sila. Gilayon nga naigo si Cranzo, samtang nakadalagan sa katambi nga maisan ang tatlo niya ka upod. Ginpagwa sang mga suldado nga nakumpiskar sa biktima ang isa ka riple nga Garand kag ginapasibangdan siya nga miyembro sang Bagong Hukbong Bayan.

Samtang, nalista ang iban pa nga mga kaso sang paglapas sa tawhanon nga kinamatarung sa nagligad nga mga semana.

Pagpamomba. Ginabulubanta nga 2,700 ang apektado sang *aerial bombing* sang 54th IB sa idalom sang 503rd IBde sa Barangay Maling, Balbalan, Kalinga sadtong Hunyo 7. Duha ka helicopter ang naobserbaran sang mga residente nga nagalibut-libot kag naghulog sang mga bomba.

Sa Nueva Viscaya, walo ka beses nga ginbomba sang 7th ID ang Barangay Abuyo, Alfonso Castañeda sadtong Hunyo 20 sang kaagahon. Asud-asod man ang pagpalupok sang duha ka *attack helicopter* kag naggamit sang mga *drone* ang AFP diri.

Pag-aresto. Napulo ka adlaw nga ginpriso si Edison Yu pagkatapos arestuhon sang mga pulis sadtong Hunyo 8 malapit sa embahada sang Israel sa Bonifacio Global City sa Taguig City. Si Yu ang magatambong kuntani sa protesta kontra henosidyo sang Israel sang ginkuha.

Sa Kalinga, gin-aresto sang 54th IB ang isa ka nagahingalan nga Gap-idan Claver Bawit nga ginpasibangdan sini nga hangaway sang BHB sa Barangay Balantoy, Balbalan sadtong Hunyo 6.

Pagpang-ipit. Sa Bulacan, ginreyd sang 80th IB kag pulis ang balay sang lider-pesante nga si Ronnie Manalo sa Barangay San Roque, San Jose del Monte City sadtong Hunyo 18. Ginapagwa sang pulis nga nakuha sa balay ang mga armas, granada kag iban pa nga gamit bisan wala tawo diri. Sa pareho nga adlaw, ginkadtuan sang mga suldado ang balay sang lider-pesante nga si Cecilia Rapiz sa Barangay Paradise 3 sa amo nga syudad.

Sa Rizal, pasulit-sulit nga gin-ipit sang mga suldado ang 80-anyos nga lider-mangingisda nga si Romy Antazo. Sadtong Mayo, ginkuha siya sang apat ka suldado kag pilit nga gindala sa munisipyo para "estoryahon."

Sa Negros Occidental, iligal nga ginsulod kag ginpang-ukay sang mga suldado sang 94th IB kag paramilitary ang pito ka balay sa Sityo Cabagal, Barangay Buenavista, Himamaylan City sadtong Hunyo 7. Gin-ipit man sang mga suldado si Evelyn Manait, myembro sang Ituman-Bukidnon, sa Barangay Amontay, Binalbagan sadtong Hunyo 13.

Sadtong una nga semana sang Hunyo, "ginbisita" sang mga pwersa sang estado sila ni Mafel Macalanda kag Linda Ladino, mga lider-tumandok sa Cagayan Valley, sa ila mga balay sa Baguio City kag Cagayan para paandaman sila nga paga-arestuhon. AB

Protesta kontra-henosidyo sa mga Palestino. Nagprotesta sadtong Hunyo 8 ang nagkalain-lain nga grupo kag sektor sa embahada sang Israel sa Taguig City para sawayon ang Zionistang estado sini sa nagapadayon nga henosiyo sa mga Palestino. Gindumdom nila ang ika-8 ka bulan, halin Oktobre 7, 2023, sang pag-atake kag pagpamomba sang Israel, sa suporta sang US, sa Gaza. Sa lista sadtong Hunyo 17, naglab-ot sa 37,347 ang ginpatay sang Israel sa Gaza.

"Trespass rule" sang China sa WPS, ginsaway. Nagprotesta sa atubang sang konsulado sang China sa Makati City ang mga mangingisda kag iban pa nga demokratiko nga organisasyon sadtong Hunyo 14 para ipanawagan ang pagpakakas sa "trespass rule" ukon paandam sa pagdakop sang China sa mga "dumuluong" nga magasulod sa "teritoryo" sini sa South China Sea. Ginpatuman ini sang Chinese Coast Guard sugod sang Hunyo 15. Base sa kasuguan, igadetine sang China ang mga maaresto halin 30 tubtob 60 ka adlaw.

Karaban kontra dalagko nga mina sa Benguet. Ginatos ka mga residente sang Itogon, Benguet ang naglunsar sang karaban sadtong Hunyo 13 padulong sa Benguet Provincial Capitol para iduso ang pagpauntat sa pagpalapad sang dalagko nga kumpanya sa mina nga Itogon-Suyoc Resources, Inc. kag Benguet Corporation, Inc.

Protesta kontra-demolisyon sa Quezon City kag Mandaue City. Naglunsar sang protesta ang mga residente sang King Christian St sa Barangay Bagbag, Novaliches, Quezon City sadtong Hunyo 15 para pamatukan ang demolisyon sa ila nga komunidad. Nagprotesta man sadtong Hunyo 14 ang mga imol nga residente sa sulod sang Cebu International Convention Center batuk sa nagahana nga demolisyon sa ila nga kabalayan sa Mandaue City, Cebu.

Jeepney phaseout, paantus. Liwat nga nagprotesta ang mga drayber kag opereytor sang dyip sadtong Hunyo 10, kadungan sang pagpamahog sang LTRFB kag LTO nga pasingkion sini ang pagpangdakop sa nagabyahe nga mga dyip nga wala nagpasakop sa sapilitan nga konsolidasyon. Nagti-gayon sang mga protesta sa Metro Manila kag Iloilo City ang ginatos ka mga drayber. Samtang, naglunsar naman sang tatlo ka adlaw nga untat-byahe ang Manibela sadtong Hunyo 10 tubtob 12. Nagmartsa sadtong Hunyo 7 padulong Mendiola ang mga miyembro sang Piston isip kahiwatan sa ika-43 nga anibersaryo sang pederasyon. Ginduso nila sa rehimen Marcos nga ibasura ang PUVMP nga nagapatay sa ila nga palangabuhian.